



Cyflwyniad i'r 6ed yn Ysgol Plasmawr



Prosbectws llawn ar safle wê'r ysgol:
www.ysgolplasmawr.cymru



Ysgol Gyfun Gymraeg Plasmawr

Ffordd Pentrebaen
Y Tyllgoed
Caerdydd
CF5 3PZ

Ffôn : (029) 20 405499
Ffacs: (029) 20 405496

Pennaeth: Mr John D Hayes



Pentrebane Road
Fairwater
Cardiff
CF5 3PZ

Tel: (029) 20 405499
Fax: (029) 20 405496

Headteacher: Mr John D Hayes

2018-2019

Annwyl Fyfyrywyr,

Pleser yw cael cyflwyno'r prosiectws hwn i chi sy'n cynnwys manylion am gyrsiau Chweched Dosbarth Ysgol Gyfun Gymraeg Plasmawr, yn gyrsiau galwedigaethol, Uwch Gyfrannol a Safon Uwch. Mae'r prosiectws llawn sy'n cynnwys disgrifiadau pynciol ar wefan yr ysgol.

Bydd pob myfyriwr yn Chweched Plasmawr yn astudio ar gyfer y Fagloriaeth Gymreig. Er mwyn llwyddo yn y Bac bydd angen ichi sicrhau gwella a dysgu sgiliau newydd a defnyddiol, wrth lwyddo byddwch yn ennill cymhwyster gwerthfawr a chadarn.

Mae'r Chweched Dosbarth yn bodoli ar gyfer disgyblion sydd yn benderfynol o lwyddo. Mae'n cynnig cyfrwng addysg ardderchog gydag ystafell gyfrifiadurol o'r ansawdd orau, cyfleusterau astudio preifat ynghyd â chyfle i gymryd rhan mewn ystod o weithgareddau yn feunyddiol. Yn bennaf oll, mae'n cynnig cyfle i chi barhau â'ch addysg a'ch diddordebau ehangach o fewn ethos Cymreig a Chymraeg unigryw'r ysgol.

Ein nod yw cynnig ystod eang o gyrsiau ym Mhllasmawr, gan sicrhau eich bod yn dewis cyfuniad addas a doeth wrth gyrraedd y garreg filltir bwysig hon yn eich gyrfa addysgol. Gobeithiwn fel ysgol y gallwn eich arwain a'ch cynghori gan sicrhau'r gefnogaeth orau bosibl wrth i chi ystyried eich dyfodol a'ch gyrfa.

Darperir cyfleoedd di-ri i bob un o'r Chweched gyfrannu'n allgyrsiol weithgareddau' ysgol a'r gymuned leol, yn deithiau, yn ymweliadau, yn weithgareddau elusennol, yn gystadlaethau ac yn glybiau. Bydd pob aelod yn derbyn y fraint o fod yn Swyddog Chweched Dosbarth, a fydd yn arwydd sicr o'r statws newydd a fydd gennych o fewn yr ysgol.

Felly, dewiswch yn ddoeth, gan ofyn am gyngor eich rhieni, athrawon pwnc a thiworiaid, a chymerwch eich addysg eich hun o ddifri!

Edrychaf ymlaen at eich croesawu yn ôl i'r Chweched ym mis Medi.

Yn gywir iawn,
Mr John Hayes
Pennaeth



Gwisg y Chweched Dosbarth



Mae polisi gwisg ysgol y Chweched yn hyrwyddo arfer dda wrth baratoi disgyblion i fyd gwaith. Disgwyliwn i aelodau'r Chweched wisgo'n drwsiadus gan osod esiampl dda i gymuned yr ysgol.

1. Trowsus :	Du neu lwyd, ffurfiol (dim jeans / leggins)
2. Sgert:	Du neu lwyd, ffurfiol
3. Crys:	Gwyn
4. Siwmpwr neu Gardigan swyddogol y chweched yn unig*	
5. Esgidiau:	Du, dim esgidiau ymarfer
6. Tei:	Tei Chweched Dosbarth*
7. Tlysau / Colur:	Fel y byddai'n addas i fyd gwaith

Gwisg arferol yr ysgol ar gyfer Chwaraeon.

*Gellid prynu siwmpwr/ cardigan y chweched o siopau YC Sports. Bydd tei'r Chweched ar gael o'r ysgol ar ddydd canlyniadau TGAU ac ar ddechrau'r tymor ym mis Medi ar gost o £10.00.





Canllawiau ar gyfer myfyrwyr a fydd yn dychwelyd i Blasmawr



Fel myfyrwyr hŷn yr ysgol, fe welwch gryn newid yn y rhyddid personol a gewch ac yn y cyfrifoldebau y bydd disgwyl i chi ymgymryd â nhw. Teg, felly, yw rhoi rhywfaint o arweiniad ynglŷn â'n disgwyliadau ohonoch.

- **Hybu Cymreictod yr Ysgol**

Fel oedolion ifanc sydd wedi dewis parhau â'ch astudiaethau drwy gyfrwng y Gymraeg byddwch yn awyddus i weld balchder yn yr iaith a'i defnydd ymhob agwedd o fywyd yr ysgol. Wrth reswm, byddwch yn ennyn edmygedd a pharch y disgyblion iau. Bydd ymwneud â'r disgyblion hyn mewn sefyllfaoedd anffurfiol yn hyrwyddo defnydd o'r Gymraeg ac yn cadarnhau Cymreictod yr Ysgol. Gyda hyn mewn golwg gobeithiwn weld myfyrwyr y Chweched yn datblygu cysylltiadau o bob math wrth achub ar y cyfle i sgwrsio â'r disgyblion iau, trafod eu diddordebau a'u hannog yn gyffredinol.

- **Derbyn i'r Chweched Dosbarth**

Mae mynediad i flwyddyn 12 yn agored i unrhyw ddisgybl sydd wedi cwblhau cwrs Blwyddyn 11. Beth bynnag eich gallu a'ch canlyniadau mae croeso ichi ddilyn cyrsiau yn y Chweched sydd yn addas ac yn cynnig cydbwysedd synhwyrol ar gyfer eich llwybr gyrfa. **Disgwylir bod myfyriwr sydd am ddilyn cyrsiau Lefel 3 wedi derbyn 5 A*-C yn TGAU neu mewn pynciau cyfatebol Lefel 2 gan gynnwys yr Her Sgiliau ar lefel Cenedlaethol. Rhaid i bob fyfyrwr ddilyn tri cwrs lefel 3 er mwyn bod yn aelod o'r Chweched Dosbarth ym Mhlasmawr.** Bydd rhai pynciau yn cynghori myfyrwyr bod angen gradd B yn ddelfrydol i fod yn hyderus wrth gamu ymlaen i gwrs UG. Ystyrir pob cais yn unigol gan wrando i adborth adrannol. Yn ogystal mae'n ofynnol i bob myfyriwr sy'n astudio pynciau Lefel 3 i wneud y Fagloriaeth Gymreig. Bydd rhai yn astudio'r Fagloriaeth ar lefel Uwch ac eraill ar Ganolradd. Gan fod cyfrifoldebau sylweddol ynghlwm ag aelodaeth o'r Chweched mae gan yr ysgol yr hawl i wrthod derbyn myfyriwr sydd wedi arddangos agwedd negyddol neu ymosodol tuag at werthoedd cynhenid neu staff yr Ysgol. Yn yr achosion prin yma gellir gwneud apêl i'r Prifathro neu Gadeirydd y Llywodraethwyr yn mynegi eich pryderon. Disgwylir i bob darpar fyfyrwr i gyflwyno cais ffurfiol gyda eu dewis o opsiynau (gweler y taflenni yn y ffeil).

- **Blwyddyn 12 / 13 – Dewis Cyrsiau**

Gellir dewis llwybr cyrsiau Uwch Gyfrannol (AS) ym mlwyddyn 12 gan arwain at gyrsiau Safon Uwch llawn (A2) ym mlwyddyn 13. Mae llwybrau eraill yn bosibl hefyd,

megis dilyn cyrsiau BTEC, ail-sefyll neu gyrsiau Uwch Gyfrannol, neu gymysgedd o'r tri. Disgwylir i bob myfyriwr astudio'r Tystysgrif Her Sgiliau gyda'r pynciau lefel 3.

- **Dewis y llwybr cywir**

Eich dewis chi yw pa gyrsiau sydd yn fwyaf addas ac sydd yn ateb eich gofynion unigol chi. Bydd penaeithiaid adran, tiwtoriaid personol a'r tîm cynnydd yn gallu eich cynghori ynglŷn â pha lwybrau i'w dilyn. Ni fydd unrhyw benderfyniad yn gadarn hyd nes cyflwyno canlyniadau unigol ddiwedd Awst. Bydd yr ysgol ar agor fore'r canlyniadau a hefyd y bore Gwener canlynol i chi drafod y cyrsiau sydd ar gael gydag uwch athrawon. Yn ogystal â hyn bydd rhaglen anwytho a chroesawu i'r Chweched Dosbarth ddechrau Tymor yr Hydref er mwyn cynorthwyo pob myfyriwr i ddewis cyfuniad o astudiaethau addas.

- **Cyfnodau Astudio Unigol / Cyfnodau Rhydd / Dyletswyddau**

Fel myfyrwyr cyfrifol disgwylir ichi sicrhau cydbwysedd yn eich amserlen rhwng gwersi ffurfiol, cyfnodau o astudio personol a'r cyfle i hamddena. Byddwn fel ysgol yn eich annog i drefnu'r cyfnodau'n rhesymol, fel eich bod yn gallu manteisio ar yr adnoddau gwaith sydd ar eich cyfer yn yr ysgol, yn ogystal â chyfleoedd i ymlacio gyda chyfeillion. Ar adegau penodedig yn ystod y dydd bydd gennych yr awdurdod i weithredu rhai dyletswyddau yn ôl y galw. Gall yr adegau'r rhain gynnwys cyfnod y bore / gwasanaeth ac amser egwyl. Bydd angen ichi sicrhau diogelwch y plant iau ond ar yr un pryd ennill eu parch. Dylid delio â phob sefyllfa'n gadarn ac yn gyfrifol. Byddwch hefyd yn arolygu ymddygiad ar y bysiau ac yn adrodd yn ôl i athrawon yr ysgol am unrhyw ymddygiad neu agwedd amhriodol.

- **Partneriaeth Chweched Dosbarth**

Bwriad y bartneriaeth rhwng Plasmawr a Ysgolion Glantaf a Bro Ederm yw cynnig dewis cwricwlaidd ehangach trwy gyfrwng y Gymraeg. Trefnir trafndiaeth ar gyfer pynciau partneriaeth **yn unig** ac mae hyn yn digwydd yn ystod cyfnodau cofrestru egwyl a chinio. Gweler y colofnau am fwy o wybodaeth ynglŷn â phynciau sydd yn cael eu cynnig eleni. Mae argaeledd y pynciau yma yn ddibynnol ar lleiafswm ac uchafswm o fyfyrwyr yn ôl gofynion yr ysgol sy'n cynnig.



- **Presenoldeb / Prydlondeb**

Disgwylir presenoldeb uchel a phrydlondeb i gofrestri, i wersi, i gyfarfodydd ac i ddyletswyddau. Bydd angen nodyn absenoldeb, am unrhyw gyfnod o salwch. Tanlinellir pwysigrwydd esgusodi am absenoldebau sy'n ymwneud â chysiau penodedig. Bydd rhaid rhoi gwybodaeth benodol i'r tiwtor personol / arweinydd cynnydd ymlaen llaw. Cwrteisi sylfaenol sy'n perthyn i fyd yr oedolyn yw'r pethau hyn a gwerthfawrogwn eich cydweithrediad.

- **Cyfrannu at fywyd yr ysgol yn ei amrywiol agweddau**

Yn ogystal â hyrwyddo a chadarnhau Cymreictod yr ysgol, gall myfyrwyr hŷn gyfrannu'n helaeth drwy fod o gymorth ar nosweithiau rhieni, cyngherddau, ffeiriau ac ati a thrwy hybu cysylltiad agos rhyngom â'r gymuned leol. Disgwylir i chi gynorthwyo â gwaith elusennol, yr henoed, yr anabl a phlant ifanc





Bywyd yn y Chweched



- **Cyngor y Chweched**

Etholir dau aelod o bob dosbarth cofrestru l'r cyngor 6ed. Er hyn, mae gwahoddiad agored i bob cyfarfod, a gynhelir yn wythnosol. Trafodir unrhyw fater sy'n ymwneud â'r Chweched ac yn aml trefnu digwyddiadau cymdeithasol, elusennol a chodi arian y byddwn. Mae'r Cyngor yn ethol swyddogion i'w arwain, Cadeirydd, Is-gadeiryddion, Trysoryddion ac Ysgrifenyddion, y swyddogion hyn yn aml sy'n cynrychioli'r Chweched mewn digwyddiadau ffurfiol.

- **Swyddogion**

Bydd myfyrwyr blwyddyn 13 yn medru gwenud cais arbennig i fod yn Uwch Swyddogion sy'n derbyn cyfrifoldebau arbennig. Allan o swyddogion yma bydd Prif Fachgen a Phrif Ferch yn cael eu hethol.

- **Elusen y Chweched**

Bob blwyddyn mae Cyngor y Chweched yn penderfynu ar elusen i'w gefnogi yn ystod y flwyddyn. Yn y gorffennol, cefnogwyd elusennau megis Apêl Arch Noa ; Dolen Cymru; Ymchwil Prydeinig y Galon; Llamau; Elusen HIV / AIDS; Mind Cymru a Bopath; Maggies a Ty Hafan. Braff yw gweld criw gweithgar eto eleni yn codi arian i elusen Manon Jones Foundation. Fel rhan o galendr elusennol y Chweched mae nosweithiau Cyri, Sineaid a chwisiau wedi dod yn boblogaidd iawn.

- **Elusennau Llys**

Mae'r Chweched wedi codi arian yn ogystal i elusennau llys yr ysgol ac wedi cymryd rôl flaenllaw yn trefnu'r Hwyl Ras, Rhynglysol a gweithgareddau llys. Eisoes codwyd swm anrhydeddus trwy amrywiol ddulliau a phrosiectau.

- **Nosweithiau i Fl 7 & 8**

Ers sefydlu'r Chweched, rydym wedi trefnu nifer o bartïon i flynyddoedd iau'r ysgol, gan gynnwys nosweithiau Calan Gaeaf, Parti Nadolig a Disgo Santes Dwynwen. Bu'r gweithgareddau yn llwyddiannus ac yn ffordd dda o godi arian at elusen y Chweched. Ffurfiolwyd hyn bellach drwy glwb misol i flwyddyn 7 sef P67 sy'n cael ei gynnal gan swyddogion y 6ed.

- **Eisteddfod, Mabolgampau a Chwaraeon Rhyng-lysol.**

Mae pob llys yn ethol capteiniaid llys ac mae'r 6ed yn allweddol yn hybu gweithgareddau dwl a difrifol o fewn yr ysgol. Mae cystadlaethau'r 6ed (siarad

cyhoeddus a siarad ar y pryd) adeg Eisteddfod bob amser i'w mwynhau ac arweiniad y myfyrwyr hŷn ymhob gweithgaredd yn allweddol. Cafodd y capteniaid llysoedd rôl hanfodol eleni yn lawnsio'r tri llys newydd sef Taf, Elai a Rhymni.

- **Ardal 6ed - Ystafelloedd Gwaith**

Mae gan y chweched bloc 6ed Newydd gyda dwy ystafell waith, ardal gymdeithasol, caffi ac ystafell Gelf/Graffeg. Bydd copi o brospectws colegau a Phrifysgolion Prydain ar gael yn ogystal â llyfrau cyfeiriol a gyrfaoedd. Bydd dros ugain o gyfrifiaduron a'r un nifer o gluniaduron at bwrpas y Chweched yn unig, ynghyd ag ystafelloedd gwaith tawel i gwblhau gwaith ymchwil. Bellach mae nifer o'r chweched yn dod a'i offer eu hun i'r ysgol er mwyn defnyddio'r adnodd diwifr.



- **Chwaraeon y Chweched**

Mae tîm cyntaf Rygbi, Pêl-rwyd, Pêldroed a Hoci yr ysgol eisoes wedi eu sefydlu yn llwyddiannus. Ers dyfodiad yr ystafell ffitrwydd mae'r chweched wedi mwynhau yr hawl i'w ddefnyddio adeg cyfnodau di-gyswllt ar ôl derbyn hyfforddiant o'r adran Addsyg Gorfforol. Mae aelodau o'r 6ed hefyd yn defnyddio Canolfan Hamdden Y Tyllgoed I nofio neu chwarae gemau o badminton a sboncen.



Safleoedd Wê Defnyddiol:

www.cbac.co.uk

www.ucas.com

www.careerswales.com/cy/

www.qualifications.pearson.com/en/home.html

www.welshbaccalaureate.org.uk/cy/Am-y-CBC

www.cyllidmyfyrwrcymru.co.uk/

NODIADAU
